
SIARAN AKHBAR

(Untuk Siaran Segera)

Program Keusahawanan Belia CGC100 Lulus Kohort Pertama

KUALA LUMPUR, 8 Mac 2023 – Credit Guarantee Corporation Malaysia Berhad (CGC) dengan kerjasama Kementerian Pendidikan dan PINTAR Foundation telah menyaksikan graduasi dua puluh (20) peserta daripada Program Keusahawanan Belia CGC100 (CGC100). Majlis yang telah dirasmikan oleh Pengurus CGC, Dato' Mohammed Hussein turut dihadiri oleh Presiden & Ketua Pegawai Eksekutif CGC, Datuk Mohd Zamree Mohd Ishak, Timbalan Pengarah Sektor Pembangunan dan Kerjasama Hubungan Industri (SPKHI) Kementerian Pendidikan Malaysia, TS. Supian Bin Mahmood dan Timbalan Presiden Operasi Pusat Antarabangsa bagi Pendidikan Kewangan Islam (INCEIF), Dr. Muhammad Syahmi Mohd Karim.

Inisiatif CGC100 yang telah dilancarkan pada 4 Oktober 2022 dengan pelaksanaan Program Fast Track selama 6 bulan yang menitikberatkan kemahiran baharu (*up-skilling*), memperkasa kemahiran belia sedia ada (*re-skilling*), dan kemahiran lain (*cross-skilling*). CGC100 dirumuskan untuk melengkapkan golongan belia ini dengan kemahiran insaniah dan latihan keusahawanan. Ianya juga menjurus ke arah membolehkan para usahawan membina produk dan perkhidmatan yang boleh dilaksanakan. CGC100 (Fast Track) turut merangkumi sesi perkongsian oleh pakar industri terkemuka, yang telah menyampaikan pengalaman dan pengetahuan berharga mereka dengan para graduan ini. Kursus intensif untuk para usahawan daripada ekonomi gig ini juga menerapkan kemahiran asas keusahawanan yang bertujuan untuk melengkapkan peserta dengan ilmu bagi menjalankan perniagaan dengan cekap.

Pengurus Besar PINTAR Foundation, Pn. Norzalina Masom dalam ucapan perasmianya berkata “CGC100 (Fast Track) menawarkan peluang kepada peserta yang mempunyai pendidikan vokasional, daripada ekonomi gig yang berlatarbelakang industri digital dan IT, untuk memperoleh ilmu daripada jurulatih berpengalaman dan pakar industri. Program yang disusun dengan teliti ini bertumpu kepada topik-topik penting seperti cara pengurusan operasi

perniagaan, kewangan, sumber manusia dan kemahiran insaniah untuk memupuk usahawan muda agar mereka mampu menguruskan perniagaan pada masa hadapan dengan jayanya.”

Datuk Mohd Zamree Mohd Ishak berkata dalam ucapan alu-aluannya, “CGC100 bertujuan untuk menyemai nilai-nilai murni dikalangan belia dan menggalakkan keusahawanan sebagai pilihan kerjaya yang berdaya maju. Program ini bermatlamat untuk melengkapkan usahawan baharu dengan kemahiran dan nilai perniagaan yang akan meningkatkan kecekapan dan daya tahan.” Datuk Mohd Zamree juga menekankan bahawa graduan akan memainkan peranan penting dalam membentuk ekonomi yang akan datang. “Usahawan muda akan menjadi tulang belakang ekonomi gig yang akan menjadi sektor pertumbuhan utama di masa hadapan. Peranan CGC adalah untuk menyediakan akses kepada pembiayaan dan penerapan nilai yang boleh membina daya tahan dan kecekapan PMKS. Ini akan membolehkan mereka untuk menguruskan perniagaan dalam situasi yang mencabar di dalam ekonomi dan arena perniagaan.”

Dalam ucapan utama, Dato' Mohammed Hussein berkata, “Program ini adalah komitmen CGC untuk memupuk semangat keusahawanan pada usia muda. CGC100 adalah untuk golongan belia daripada ekonomi gig yang mempunyai kemahiran asas dalam keusahawanan. CGC sedar bahawa para peserta memerlukan lebih daripada 6 bulan untuk menjadi usahawan. Apa yang lebih penting ialah penerapan nilai teras dan kemahiran asas keusahawanan kepada para peserta CGC100 supaya mereka boleh memulakan usaha niaga mereka dengan langkah yang betul.”

Pengerusi CGC juga menekankan bahawa tujuan CGC100 adalah untuk membina asas pembangunan keusahawanan di kalangan belia dan untuk menyemai nilai teras yang perlu diterapkan jika mereka ingin melakukan sebarang tugas dengan baik, sama ada berkaitan dengan pekerjaan atau menjalankan perniagaan. Dato' Mohammed Hussein menggalakkan peserta CGC100 untuk menjalankan tugas dengan cekap dan tahu cara melukannya dengan sempurna. Beliau juga mengingatkan peserta CGC100 tentang pentingnya tatacara bekerja dengan orang ramai, mempunyai kebolehan mengurus kewangan dengan berdisiplin, penerapan etika perniagaan, supaya orang yang berurusan dengan mereka seperti kakitangan, pelanggan, pembekal dan jurubank akan mempercayai mereka dan mempunyai keyakinan untuk berurusan dengan usahawan ini. Mempunyai pengetahuan tentang apa yang berlaku

dalam industri akan membolehkan usahawan menyesuaikan diri dengan perubahan dan mengekalkan perniagaan. Dato' Mohammed Hussein juga menekankan bahawa keupayaan untuk menyesuaikan diri adalah kunci kepada kemampuan.

"Hari ini saya melihat ramai daripada anda kelihatan lebih yakin. Inilah objektif program kami, iaitu untuk memberi anda keyakinan bagi menghadapi masa hadapan. Tiada jalan pintas dan mudah untuk mencapai kejayaan. Usaha yang berterusan akan meningkatkan kecekapan dan daya tahan. Dengan kecekapan dan daya tahan yang lebih tinggi, anda boleh mengatasi lebih banyak cabaran. Ini akan menjadikan perniagaan anda lebih mampan. Anda harus membina perniagaan yang mampan dan berkekalan," tambahnya lagi.

Peserta CGC100 (Fast Track) dari Dungun Terengganu, Chong Jia Kuik yang mempunyai pengalaman dua tahun menjalankan perkhidmatan pembayaran permainan dalam talian mengakui, "Dua tahun lalu, saya hanya mahu menjadi YouTuber, sehingga saya perasan pelanggan saya menghadapi kesukaran untuk membuat pembayaran. Jadi, saya memulakan perniagaan untuk menyelesaikan masalah ini. Saya membeli mata wang secara maya yang diperlukan dan kemudian menjualnya kepada pelanggan. Dalam program CGC100, saya banyak belajar tentang cara membina perniagaan dan cara menyelesaikan masalah. Saya telah membuka Halaman Facebook untuk meningkatkan dan meluaskan penjenamaan dan tidak hanya menumpukan pada jualan.

Nur Liana Farhana Hasni dari Kangar, Perlis yang menjalankan perniagaan kecantikan dan spa memuji program CGC100 (Fast Track) kerana dapat membantunya menyesuaikan diri dalam menangani cabaran perniagaan. Dia kini lebih baik dalam menguruskan perniagaannya setelah mendapat kemahiran pembelajaran baharu daripada program ini. "Sebelum menyertai program CGC100 ini, saya hanya pandai merancang, tetapi lambat dan terlalu takut untuk mengambil tindakan. Lima bulan lalu, saya terfikir saya terpaksa menutup spa pada hari-hari yang saya perlu hadir ke program ini. Sebaliknya, saya mengupah dua orang kakitangan dan menjalankan sesi rawatan bergerak semasa saya berada di sini. Saya juga telah belajar cara untuk memahami butiran yang diperlukan untuk cadangan perniagaan serta pembentangan untuk pembiayaan, dengan melalui banyak latihan dan maklum balas semasa sesi ini."



Majlis berakhir dengan perasmian Program CGC100 (Comprehensive Track), kursus intensif selama 12 bulan yang ditujukan untuk menyemai kemahiran dan pengetahuan bagi peserta yang mempunyai pengetahuan minimum tentang keusahawanan. Tiga puluh peserta yang dipilih untuk program ini turut menyertai sesi Nilai Teras dan Etika Kerja yang telah disampaikan oleh Dato' Mohammed Hussein.

-TAMAT-



Mengenai CGC

Credit Guarantee Corporation Malaysia Berhad (CGC) telah ditubuhkan pada 5 Julai 1972. Ianya 78.65% dimiliki oleh Bank Negara Malaysia dan 21.35% oleh bank-bank komersial di Malaysia. CGC ditubuhkan untuk membantu Perusahaan Mikro, Kecil dan Sederhana (PMKS) yang tidak mempunyai cagaran atau rekod yang tidak mencukupi untuk mendapatkan kemudahan kredit dari institusi kewangan dengan menyediakan perlindungan jaminan ke atas kemudahan tersebut. Setakat Disember 2022, CGC telah memanfaatkan lebih daripada 522,075 jaminan dan pembiayaan kepada PMKS bernilai lebih dari RM90.3 bilion sejak penubuhannya.

Pada Februari 2018, CGC memperkenalkan imSME, sebuah platform rujukan pembiayaan/pinjaman PMKS atas talian yang pertama di Malaysia. imSME berfungsi sebagai saluran alternatif bagi PMKS untuk mendapatkan produk pembiayaan, menjimatkan masa dan kerumitan melalui proses yang memakan masa. Sejak penubuhannya hingga akhir Disember 2022, portal imSME telah menerima lebih 2.41 juta kunjungan dengan lebih 66,608 PMKS berdaftar. Pada Ogos 2020, imSME memenangi “Anugerah Kewangan Islam Triple A Asset untuk Penyelesaian Perbankan Digital Terbaik”, satu pengiktirafan terhadap penyelesaian inovatifnya untuk menyediakan PMKS dengan akses dalam talian yang mudah untuk memohon produk pembiayaan, di mana-mana, pada bila-bila masa. Pada April 2021, imSME telah dianugerahkan Platform Pembiayaan PKS Paling Inovatif di Malaysia oleh Anugerah Ekonomi Global 2021.

Untuk maklumat lanjut, sila layari www.cgc.com.my/media-release/ dan www.imsme.com.my.

Untuk Pertanyaan Media, sila hubungi kakitangan Komunikasi Korporat kami:

Mohana Arumugam

Ketua Jabatan, Komunikasi Korporat

Credit Guarantee Corporation Malaysia Berhad

mohana.arumugam@cgc.com.my

Nikhil Michael

Eksekutif Kanan, PR dan Media

Credit Guarantee Corporation Malaysia Berhad

nikhilreuben.michael@cgc.com.my